



Inzko se susreo sa Brammertzom: mandati međunarodnih sudija i tužilaca se trebaju produžiti

Tokom današnjeg susreta u Sarajevu visoki predstavnik i specijalni predstavnik EU, Valentin Inzko, i glavni tužilac Međunarodnog krivičnog tribunala za bivšu Jugoslaviju, Serge Brammertz, razgovarali su o saradnji Bosne i Hercegovine sa Međunarodnim krivičnim tribunalom za bivšu Jugoslaviju.

Izražavajući zabrinutost što se pitanja o kojima se razgovaralo na njihovom zadnjem sastanku tek trebaju rješavati, visoki predstavnik i specijalni predstavnik EU Inzko i glavni tužilac Haškog tribunala Brammertz konstatirali su da su Ratko Mladić i Goran Hadžić i dalje na slobodi, da je Parlament BiH odbio zakonsku regulativu kojom se produžavaju mandati međunarodnim sudijama i tužiocima u Sudu BiH, što je od suštinskog značaja za BiH kako bi mogla efektivno rješavati slučajeve visokog profila, i da je ratni zločinac Radovan Stanković još uvijek u bjekstvu i niko nije odgovarao za njegov bijeg iz zatvora u Foči.

Ohrabren rezultatima Posebnog odjela za ratne zločine u okviru Suda BiH i Tužilaštva BiH, glavni tužilac Brammertz je izrazio svoje razočarenje činjenicom da mandati međunarodnih sudija i tužilaca nisu produženi, naglašavajući da je produženje njihovih mandata u interesu borbe protiv nekažnjavanja i pružanja podrške međunarodnoj pravdi.

Konstatirajući početak suđenja Radovanu Karadžiću ove sedmice, visoki predstavnik i specijalni predstavnik EU je rekao: «Nemoguće je izgraditi zdravo demokratsko društvo bez pravde», dodajući da «sve dok politički lideri tretiraju osuđene ratne zločince kao ratne heroje, sudovi ostaju jedino sredstvo iznošenja na vidjelo istine o tome šta se dogodilo u Bosni i Hercegovini.»

«Važno je da je suđenje počelo i da se Radovan Karadžić napokon nalazi pred licem pravde. Fokus sada mora biti na počinjenim zločinima i na žrtvama čiji interesi moraju biti podržani.»

Visoki predstavnik i specijalni predstavnik EU je ponovio da je puna saradnja BiH sa Haškim tribunalom prioritet za njegov ured i da je, ukoliko to bude potrebno, spreman da upotrijebi sve ovlasti ureda kako bi to i osigurao.